

春秋直解

春秋直解卷四

郝敬習

閔公名啓方莊公庶子在位二年

元年○春王正月

不書卽位何也公時方九歲強臣牽率以爲君國亂無朝正卽位禮史無書也

齊人救邢

邢有狄難也此所謂彼善之師亦書人人豈貶乎

夏六月辛酉葬我君莊公

秋八月公及齊侯盟于落姑季子來歸

落公穀作洛齊地

是時慶父在齊季友在陳落姑之盟爲立閔公和慶季也季友書歸慶父不書何也外之也然則予季友乎非也季友以託孤不效出奔其歸也不能戢武闡之難又不能討慶父之惡何爲予之國亂無主大臣離散畧志其還所以魯有季氏也

冬齊仲孫來

齊大夫仲孫湫也不書使不名隱也國亂無主齊來覘我故隱何以知之歸而桓公問曰魯可取乎曰不可言及慶父曰若何去之君其待之則敵情隱可知也

二年○春王正月齊人遷陽

陽小國齊人偪而遷之霸之興小國之害也

夏五月乙酉吉禘于莊公

禮三年喪畢納主于廟而後吉祭莊公喪未兩期用吉祭非禮也禘帝祭也三王之始祖皆帝子春而祫祭始祖所出之帝曰禘禮不王不禘魯禘僭也然則自閔公始乎曰禘非自閔公始喪用吉禘自閔公始因吉以表禘因事以表義也

秋八月辛丑公薨

慶父通于哀姜哀姜欲立之使賊弑公于武闈書薨

諱也不地微也

九月夫人姜氏孫

遜

于邾公子慶父出奔莒

姜氏書孫諱逃也慶父書奔諱弑也淫如姜氏猶稱夫人逆如慶父猶稱公子春秋未嘗以字貶也

冬齊高子來盟

公子申莊公庶子閔公庶兄母成風善事季友季友立之是爲僖公高子來盟定僖公也是時魯無君三年矣當慶父奔齊齊桓苟仗義討之則武闡之難不作而哀姜之醜不暴于外乃姑落一盟從與賊子及中冓禍起舉國奔竄使高傒來立子申數哀姜殺之

境外齊威名立而魯摧踣甚矣。儒者猶謂仲尼喜高
侯來不名書字之例誤之也。

十有二月狄入衛

衛自宣公以來帷薄之醜極已。有夷狄之禍宜哉。是
時齊桓公稱霸遠伐山戎救燕而近不能卻狄以全
衛。說者猶言安攘何與。

鄭棄其師

鄭文公惡高克使帥師禦狄于河上久而不召師潰
克奔陳。君子曰行法制命之謂君。有罪不討而以三
軍之衆羈勒一夫是投鼠以千金之璧也。豈不愚哉。

書曰鄭棄其師顯非之也故春秋無隱

春秋直解卷四終

春秋直解卷五

郝敬習

僖公名申。莊公庶子。閔公庶兄。在位三十三年。

元年○春。王正月。

不書即位。國亂損禮也。

齊師宋師曹師次于聶北。救邢。

左作曹伯

齊桓公以三國之師逗遛不進。狄遂滅邢。君子是以知霸者急人之難之不誠也。仲尼謂九合諸侯不以兵車。夫不以兵車合諸侯可也。不以兵車而亡諸侯。孰如以兵車存之之爲愈也。愛兵車而不愛諸侯。是

亡兵車重于亡諸侯也。故曰：管仲之力。猶曰：管仲之謀云爾。讀管子書而後知聖言之精也。管子者，貪亂爲功，以取爲予者也。

夏六月，邢遷于夷儀。齊師、宋師、曹師、城邢。

夷儀公作陳儀

不書齊遷，不歸齊功也。霸者巧于市恩而精于計獲。苟魯不內亂，無立孤之績，邢衛杞不亡，無興滅之恩。救邢而戰，則受敵不戰而遷，則受功。救之未亡，其德小而賑之既亡，其施大。避敵而邀功，舍小而取大，仲尼所以不齒桓之存三亡也。

秋七月，戊辰，夫人姜氏薨于夷。

齊齊人以歸

齊桓公取哀姜于邾殺之于夷以尸歸魯稱薨諱也
楚人伐鄭

鄭從齊也荆書楚史文也胡氏正名之說訕楚也訕
楚以伸齊晉春秋未嘗與齊晉未嘗訕楚三國皆不
寧侯也楚稱王而齊晉不稱王楚僭名而齊晉僭實
也春秋于楚生稱子而沒其王死不書葬而沒其諡
如此而已矣

八月公會齊侯宋公鄭伯曹伯邾人于榿稱宋地
公作打
謀楚也

九月公敗邾師于偃邾地公
作偃

脩哀姜之怨也

冬十月壬午公子友帥師敗莒師于鄆歷魯地獲莒拏女

聲鄆公作
犁穀作麗

魯請慶父于莒殺之莒人來責賂季友敗之而獲莒子之弟拏公賜季友汶陽田及費季氏之盛自此始十有二月丁巳夫人氏之喪至自齊

哀姜之柩也說者謂不書姜爲貶夫不書姜而書夫人非貶也姜之不淑何待于貶乎君母而死于人手暴尸境外臣子恫乎有餘悲奈何更持深文似申商也

二年○春王正月城楚丘

魯與諸侯爲衛城也。衛滅于狄，營楚丘以遷。此齊人功而不書齊，何也？康叔故宇，已淪爲腥土矣。何功之有？不存之未亡，而遷之旣滅，霸者自以爲功。春秋之義，貴大公也。

夏五月辛巳葬我小君哀姜

哀姜之不能小君甚矣，未有以貶之。

虞師晉師滅下陽

號邑下公穀作夏

晉伐虢，以璧馬假道于虞。虞導晉師入虢，滅下陽，書先虞戎首也。說者于齊桓之霸也，謂爲安中國而中。

國日吞併也。謂爲攘夷狄而夷狄日侵陵也。謂爲九合諸侯而晉楚日橫行也。謂爲一匡天下而小國日顛危也。謂爲尊周室而王室日卑微也。讀春秋而霸者之事若燭照矣。

秋九月齊侯宋公江人黃人盟于質

宋地公作質澤

• 江黃楚與國也。盟江黃謀楚也。說者謂人爲大夫。豈江黃大夫而與齊宋之君齒乎。可知書人之非微矣。冬十月不雨。

秋旱也。

楚人侵鄭。

鄭從齊也

三年○春王正月不雨○夏四月不雨

自冬至夏恆暘也

徐人取舒○六月雨

前此不雨者凡九月

秋齊侯宋公江人黃人會于陽穀齊地

再謀楚也

冬公子友如齊涖盟

穀作公子季友涖
公穀作莊後同

公不與陽穀之會使上卿往受盟書涖史尊內也

楚人伐鄭

四年○春王正月公會齊侯宋公陳侯衛侯鄭伯許男
曹伯侵蔡蔡潰遂伐楚次于陘

刑楚地

齊以諸侯伐楚蔡楚與國侵蔡致楚也次于陘待平
也

夏許男新臣卒

穀梁謂許男死于師不地內桓師非也蔡近許許男
以病歸卒何以知之宣公九年書晉侯卒于扈成公
十三年曹伯廬卒于師襄公十八年曹伯負芻卒于
師二十六年許男甯卒于楚昭公二十三年蔡侯東
國卒于楚定公四年杞伯成卒于會凡諸侯客死未

有不地者故許男卒於其國也

楚屈完來盟于師盟于召陵

諸侯之師次于陘楚使屈完來師遂退次于召陵盟說者曰桓公服楚矣春秋與之非也當是時桓公稱霸二十餘年諸侯力能抗齊不受盟者惟秦與楚秦遠而楚近楚屈則東諸侯震而齊益張故桓公拳拳以楚爲事而心畏楚之強也不得楚盟而心畏諸侯輕齊也故先舉蔡嘗楚以示諸侯而次于陘夫次陘無必進之志矣何以知其然也齊果能討楚于楚使來當首問其稱王問其伐鄭問其虜蔡侯之罪有辭

止無辭進服則止不服則進此堂堂問罪之師矣釋
此不言枝梧遠引包茅不貢昭王不復是明借以易
托之辭苟求完局恐逢彼之怒至戰而自損也守口
如瓶畏敵如虎奚貴爲討哉陳師以出未踐郢國之
郊未覲楚子之面僅僅屈完一來遂振旅歸歸未踰
年而楚滅弦矣踰年又圍許矣自召陵一見楚大夫
後同盟有事未聞楚一介一旅從其桀驁如故也齊
何嘗能服楚而仲尼與之然則楚不當伐與曰春秋
諸侯無日不相伐數諸侯之罪可伐不但楚論討
罪之權征伐不在齊謂王室不尊乎無如子頽叔帶

之難。惠襄之播遷矣。然而非楚也。謂中國不安乎。無如狄滅邢。衛戎入曹。魯內亂。晉亡虢。鄭伐許。齊滅遂。滅譚。遷陽。降鄆。伐宋。與魯陳之甚矣。非獨楚耳。謂夷猾夏乎。楚本非夷也。管仲讓楚。不謂猾夏。而後儒以爲猾夏。謬也。春秋以夷猾夏者。莫如狄與戎。齊不能攘而欲攘楚左也。故孟子曰。春秋無義戰。仲尼之徒無道桓文之事者。召陵城濮皆所謂摟諸侯以伐諸侯。三王之罪人也。仲尼奚取焉。

齊人執陳轅濤塗

轅公穀作袁

陳轅濤塗語鄭申侯曰。諸侯之師還過陳。鄭陳鄭病。

可給使東循海申侯以告齊齊人執轅濤塗夫師行
而人病之師可知也不罪已而責人否臧凶也書執
以力服也孟子曰以力服人未有能服人者春秋惡
之

秋及江人黃人伐陳

齊命也討其誤師

八月公至自伐楚○葬許穆公

穆公作魯

冬十有二月公孫茲帥師會齊人宋人衛人鄭人許人

曹人侵陳

茲公作慈

再伐也陳服乃歸轅濤塗

五年○春晉侯殺其世子申生

晉獻公嬖驪姬生奚齊其嫡生卓子世子申生賢驪姬譖之遂自縊也自縊而書晉侯殺猶晉侯殺之也陳宣公殺太子御寇書陳人猶陳人也故春秋無例杞伯姬來朝其子

歸寧也因以其子朝

夏公孫茲如牟

其事不可考傳謂娶焉未聞大夫娶而書者其必有故

公及齊侯宋公陳侯衛侯鄭伯許男曹伯會王世子于

首止

衛地公穀作首戴後同

諸侯有事王室不朝京師而在世子于侯國非禮也傳曰惠王欲易世子立叔帶桓公合諸侯定之然則世子無王命爲私會也背父植黨託外援脅內無父也桓公不能以忠義匡王而誘世子樹私惠無君也要君脅父大亂之道也及世子立叔帶以戎伐周王室再亂齊爲逋逃主而說者謂首止定儲豈其然乎豈其然乎

秋八月諸侯盟于首止○鄭伯逃歸不盟

惠王惡諸侯之盟也召鄭伯從于楚鄭伯逃歸君子

以是知周末嘗患楚也而齊晉彊爲周患之齊晉未嘗爲周損楚也而世儒彊爲周損之

楚人滅弦弦子奔黃

弦因江黃附于齊楚滅之

九月戊申朔日有食之

冬晉人執虞公

晉再假道于虞伐虢滅之還館于虞遂滅虞不書滅虞虞自滅也書執虞公惡晉也

六年○春王正月

夏公會齊侯宋公陳侯衛侯曹伯伐鄭圍新城

鄭伯逃盟也

秋楚人圍許諸侯遂救許

楚圍許救鄭也

冬公至自伐鄭

七年○春齊人伐鄭

新城之役未得志也

夏小邾子來朝

公作小邾
姜子後同

鄭犁來也書子爵也說者謂齊桓公始請王爵之無
稽

鄭殺其大夫申侯

齊討逃盟。鄭伯殺申侯以說。夫逃盟非申侯罪。而申侯不爲無罪。初陳轅濤塗之給齊師也。與申侯謀。申侯遂以告齊。是申侯爲鄭不如轅濤塗爲陳也。人孰無君而賣友。誤國罪一。齊執濤塗。賞申侯虎牢。夫虎牢。鄭之錫土也。齊焉能奪君之有與臣。申侯亦不請於君。受之罪二。旣受之。遂美其城。自炫。知有霸主蔑視其君。罪三。書曰。一人三失。怨豈在明。宜其及矣。

秋七月公會齊侯。宋公。陳世子款。鄭世子華。盟于甯母。

魯地穀作寧母

謀鄭也是役也。鄭世子華以鄭叛于齊。管仲辭焉。明

年鄭伯遂受盟于華由是得罪

曹伯班卒

班公作般

○公子友如齊○冬葬曹昭公

八年○春王正月公會王人齊侯宋公衛侯許男曹伯

陳世子款盟于洮

地以曹

鄭伯乞盟

陳世子款下公

惠王崩世子患叔帶告于齊爲洮之會鄭伯悔逃乞

盟

夏狄伐晉

狄人滅邢滅衛伐晉滅溫儻所謂猾夏者非與齊人

皆不能討而世儒特以伐楚爲攘夷何居

秋七月禘于大廟用致夫人

僖公夫人薨。姜也不書氏。公夫人不別也。遠則氏以別之。歸魯不書。何也。無故不書。文哀出三姜。故詳也。魯禘非禮。五月禘。非時。致夫人用禘。是以夫人禘也。諸傳謂祔哀姜。哀姜無祔禮。五年而後祔乎。非也。

冬十有二月丁未。天王崩。

按傳。惠王崩于去年之冬。世子以叔帶故。秘不發喪。至是始來告。書後期。史文也。經因之。皆所謂無毀譽也。

九年○春。王正月丁丑。宋公御說。

悅

卒。

公穀正月作三月。御作禦。

夏。公會宰周公。齊侯。宋子。衛侯。鄭伯。許男。曹伯。于葵丘。

周地

定襄王也。宋稱子襄公在喪也。

秋七月乙酉伯姬卒。

伯姬未歸書卒其故不可考。

九月戊辰諸侯盟于葵丘。

會而後盟也。說者謂此舉為齊桓公盛事。春秋無以

予之。

甲子晉侯僝

說

諸卒

甲子公作甲戌僝公數作說

冬晉里克殺其君之子奚齊

殺公作我

晉獻公殺申生為奚齊也。身死而奚齊不免焉。慈父

之爲愛子計者宜何如哉

十年○春王正月公如齊

朝也不書至不告至也

狄滅溫溫子奔衛

溫子周大夫蘇公叛王卽狄又不能于狄狄人滅之

晉里克弑其君卓及其大夫荀息

卓公作卓子

初申生之死也獻公以奚齊卓子屬荀息君命雖頗國可無主乎里克旣殺之立卓子又殺之吁甚矣

夏齊侯許男伐北戎

北戎之役不憚再舉狄蠶食中土而置不問是舍根

本灌枝葉也

晉殺其大夫里克

初驪姬之亂公子重耳奔蒲夷吾奔梁是歲王人與齊秦共立夷吾爲惠公惠公入殺里克討其殺二君與一大夫仲尼無以非之胡氏曲爲之辭書爵之例誤之也

秋七月○冬大雨雪

雪公作雹

十有一年○春鄭殺其大夫平

平鄭父

里克之黨也

夏公及夫人姜氏會齊侯于陽穀

婦人送迎不出門見兄弟不踰閭會于陽穀非禮也

秋八月大雩

旱禱也

冬楚人伐黃

黃貳于齊也

十有二年○春王三月庚午日有食之○夏楚人滅黃黃以齊見滅而齊人不能救君子是以知霸力之難恃也

秋七月○冬十有二月丁丑陳侯杵臼卒

杵公作處

十有三年○春秋侵衛

狄之禍衛甚矣。世儒猶謂春秋有攘夷者。

夏四月葬陳宣公。

公會齊侯宋公陳侯衛侯鄭伯許男曹伯于鹹。

衛地。

子帶召戎伐王。諸侯謀戍周。是時子帶在齊。桓公主藏而外與諸侯謀戍。霸者之事如鬼蜮。有虛名而無實意也。

秋九月大雩。

夏正七月也。或曰譏後時。非也。雩後時旱旣甚矣。冬公子友如齊。

十有四年。○春諸侯城緣陵。

犯邑。

左傳謂諸侯不書其人有關也。經有關而傳不知。何以輔經。或曰舊史闕也。舊史闕書諸侯。凡書諸侯者皆史闕矣。城緣陵何也。遷杞也。杞逼于淮夷。齊率諸侯遷之。不書齊何也。齊既稱伯矣。狄滅邢。滅衛。滅杞。三國而齊不能保一。勞諸侯之衆。紛紛改作。齊任功而諸侯憊。是以書諸侯也。

夏六月季姬及鄆子遇于防。使鄆子來朝。

鄆穀作緡後同

左傳謂鄆季姬歸寧。公怒止之。以鄆子不朝也。夏季姬期鄆子于防。以朝。若是則季姬已爲鄆夫人。何以不書鄆季姬。季姬既室鄆矣。明年九月又書季姬歸。

于鄆何也。公穀謂季姬奔鄆子成約使鄆子求娶如後世公主自擇夫之類書來朝諱之也。

秋八月辛卯沙鹿崩。

沙鹿晉地山崩書異也。重耳將入晉楚爭而天下紛紛儻其兆與。

狄侵鄭。

冬蔡侯肸歆入卒卒。

十有五年○春王正月公如齊○楚人伐徐。

徐卽齊也。

三月公會齊侯宋公陳侯衛侯鄭伯許男曹伯盟于牡。

丘遂次于匡地公孫敖帥師及諸侯之大夫救徐帥公作事

同後

自霸者有盟會而中原無寧歲矣仲尼所憂不在徐也。晏嬰有言。飢者弗食。勞者弗息。方命虐民。盟會之謂也。儒者顧亟稱之曰。某衣裳之會。某兵車之會。嗟夫。春秋第書會耳。何擇其爲兵車爲衣裳也。巧言夸毗。歆艷霸功。而竊附于仲尼之徒。所可爲公穀恨者。識不足也。

夏五月日有食之。○秋七月齊師曹師伐厲。

救徐也。厲楚與國也。

春秋左傳卷五 襄公五年
八月螽○九月公至自會○季姬歸于鄆

乙卯晦震夷伯之廟

晦月之盡也夷伯魯大夫展氏霆擊其廟異也

冬宋人伐曹

春同盟而冬伐之不信也時曹從齊伐厲宋伐曹是
宋有貳志于楚也齊稱霸以來宋無會不與桓公方
以繼嗣託宋宋有異志何與舊史亡其詳不可考

楚人敗徐于婁林

徐地

宋曹相攻故救徐無功

十有一月壬戌晉侯及秦伯戰于韓獲晉侯

晉惠公之入也淫瀆而好殺背施而貪災秦予之秦復取之故曰獲也

十有六年○春王正月戊申朔隕公作實石于宋五是月

六鷁逆穀作鷁退飛過宋都

記異也不數年而襄公戰死儻其兆與

三月壬申公子季友卒

季友以援立之恩公爵之世卿獲莒拏賜費與汶陽田遂爲強宗竟以弱魯古蓋臣所以戒于寵利也說者謂春秋賢之書公子豈其然乎

夏四月丙申鄆季姬卒○秋七月甲子公孫茲卒

冬十有二月公會齊侯宋公陳侯衛侯鄭伯許男邢侯
曹伯于淮

齊人又以諸侯城鄆役卒夜呼遂不果城自葵丘之
會諸侯無歲不勤十三年會于鹹十四年城緣陵十
五年會牡丘今年又會于淮城邢城衛城杞皆諸侯
也禮曰君子不竭人之忠以全交也勞人而自以爲
功頻數亡厭欲以全交難矣宋齊至相得也往年伐
曹已有貳志今與盟是陽諾耳霸者之澤如潦水立
涸烏能使人不倦乎

十有七年○春齊人徐人伐英氏

英氏楚屬也齊不能救徐遷怒于英遂以徐伐之

夏滅項

魯滅也季孫之謀公在會齊人止公不書諱也

秋夫人姜氏會齊侯于平九月公至自會

權臣賈禍而君因妻以求免反國不問欲季氏不橫
得乎

冬十有二月乙亥齊侯小白卒

齊桓公弑兄得國不可以爲人弟身爲侯伯畢世不
王不可以爲人臣嫡庶不正羣子閹牆不可以爲人
父內寵外嬖釀成身後之禍幾致亡國不可以爲人

君大本先撥矣晚節荒耄以後事屬宋襄牡丘之會
宋有二志負託不明貽謀不善宜身死不殞而一敗
瓦解也碌碌經營四十餘年說者謂存三亡國定王
世子葵丘五盟爲高誼質諸春秋無顯蹟論語九合
一匡本管子書中語桓公嘗自稱聖人因言節取成
人之美云爾世儒緣飾一匡爲尊周九合爲安夏春
秋具存何有影響千餘年承訛不察足以見霸術迷
人而春秋大義虧蔽于世儒之附會志士所爲投筆
歎也

十有八年○春王正月宋公曹伯衛人邾人伐齊

宋公下公

有會
字

桓公甫卒諸侯伐齊霸者之澤可知已是時齊易牙
豎刁因內寵殺羣吏立公子無虧孝公奔宋宋襄公
忘平生之言帥諸侯伐之衛人以怨報德曹人黨讐
伐喪人情叵測如此

夏師救齊

魯救也

五月戊寅宋師及齊師戰于甌

言齊地

齊師敗績

宋以諸侯之師伐齊齊人懼殺無虧四公子爭立與
宋戰宋人敗之而立孝公夫救焚者不齊藁解闔者

不控參操戈入室非所以拯孤也故夫齊桓之屬後嗣禍後嗣者也宋襄之託人孤斲人孤者也

狄救齊

齊桓公身死未寒而人攫其遺孤非我族類猶相救恤宋衛之君獨爲匪人此所謂不如諸夏之亡也

秋八月丁亥葬齊桓公

冬邢人狄人伐衛

爲齊伐也齊人之德狄人之怨邢與衛等邢狄助齊而衛背之詩人所以賦木瓜也

十有九年○春王三月宋人執滕子嬰齊

滕小國也。書執惡宋也。齊桓公主盟四十年。九合之會。滕不至。不討恤其小也。宋襄公行誼未著。竊竊然自大。以求諸侯侮弱爲強。諸侯所以愈不附矣。

夏六月。宋公曹人邾人盟于曹南。

宋公公作宋人

○鄆子會盟

于邾。已酉。邾人執鄆子用之。

宋欲爲盟主乎。諸侯大者。若齊魯衛陳鄭皆未至也。一鄆子何能濟。旣至矣。而又討其後。使邾人用以爲牲。施于氓隸不可。況友邦之君乎。以此希小白之名。猶挾彈而求鳥也。

秋。宋人圍曹。

宋伐曹數矣曹南之盟蹙血未乾雖曹反覆已則不德而人誰肯從曹雖詘矣諸侯皆不附將若何所以竟爲世嗤也

衛人伐邢

報怨之師也

冬會陳人蔡人楚人鄭人盟于齊

公作公會

諸侯不忘齊桓而相與脩好于齊楚人與焉則是楚於齊素交也蒙孫通好管子之書在不然桓公死矣楚其突至邪以是知桓公擯楚非獨力不能亦并無是事以是知仲尼黜楚非獨理不可亦并無是心世

儒謂春秋夷楚何據春秋于戎狄不書族書戎戎之書狄狄之楚與諸侯同人同爵同國其微也與陳蔡齒其盛也列于諸侯上如以爲夷則宜書蠻與山戎長狄等況茲始盟豈其無別而輒與諸侯齒乎與諸侯齒是初未嘗夷楚也

梁亡

梁伯淫洎興作無度國內大潰秦人攜而有之公羊所謂魚爛而亡也書梁亡梁自亡也故不及秦

二十年○春新作南門

不時也新作創造也

夏郛告子來朝

五月乙巳西宮災

魯別宮也

鄭人入滑

滑從于衛也

秋齊人狄人盟于邢

謀衛也

冬楚人伐隨

隨叛楚也

春秋直解卷五終

春秋直解卷六

僖公下

二十有一年○春秋侵衛

爲邢侵也

宋人齊人楚人盟于鹿上

宋地

宋求盟也。霸者以力服人。卑矣。人不服而求服。卑尤甚。語曰。以德尊上也。以義尊次也。以強尊下也。宋襄強之未能。烏乎尊。

夏大旱

魯災也

秋宋公楚子陳侯蔡侯鄭伯許男曹伯會于孟執宋公

以伐宋

孟宋地公作霍穀作雪

初齊之得諸侯也宋與有力焉召陵之役致江黃以撓楚者宋也僖二年齊宋江黃盟于貫三年齊宋江黃會于陽穀則楚之銜宋久矣十二年楚人滅黃豈遂忘宋乎十七年齊桓公死宋襄公不量力而欲爲桓之事夫以國無齊之富以兵無齊之強以謀臣策士無齊諸大夫欲得志魯衛不可況微倖于強忿之楚乎牛耳未執身先爲虜詩云老馬爲駒不顧其後宋公之謂矣故直其事以爲霸者之戒不書楚執諸

侯志也。如世儒之說惑矣。齊桓未嘗擯楚。強謂之擯。楚以成其霸。宋襄乞盟于楚。又不責其不擯楚。亦予其爲霸。無論霸非春秋所予。卽擯楚之說亦自背矣。或云齊桓不與楚盟。宋襄與盟。所以失之。夫桓不與楚盟。非不欲也。楚自不來耳。楚雖不來。而齊力獨強。故可無需于楚。宋力不能得諸侯。其勢不得不求于楚。故當時霸者。原無擯楚不與會盟之事。不然宋襄偏執。豈肯乞楚爲鹿上之會哉。世儒臆說以諛霸。而于春秋之旨戾矣。

冬公伐邾

邾人滅須句。須句子來奔。須句，風姓。公風出，故爲伐邾。母夫人成風之志也。

楚人使宜申來獻捷。

伐宋之役，魯人不會。楚執宋公，使人告魯，書獻捷。史尊內也。惟王有獻捷。

十有二月癸丑，公會諸侯盟于薄，釋宋公。

公會懼楚也，不書楚釋諸侯志也。孟子曰：順天者存，魯弱能下人，故免于辱。宋無德好上人，故及于禍。必若儒者言，是仲尼以霸予宋矣。春秋不以霸弊人，豈以霸予人乎？宋襄之事，千古笑端。聖人不遠於人情。

耳

二十有二年○春公伐邾取須句

瞿

須句滅于邾魯取而復之

夏宋公衛侯許男滕子伐鄭

宋以鄭人朝楚而伐之力小好勝竟底于亡

秋八月丁未及邾人戰于升陘

刑魯地

邾以須句之怨伐魯公與之戰而敗不書敗諱也

冬十有一月己巳朔宋公及楚人戰于泓宋師敗績

楚伐宋救鄭宋人禦諸泓水之陽楚師濟不畢不擊

濟已不成列不擊濟已成列戰宋師敗宋公傷股病

七月而卒。君子曰：霸者之事，不可狃也。齊桓偶一鋪張，末路蹶矣。宋襄效之，迂闊挫衄以死。晉文又效之，其子孫驕奢，先諸侯亡，力可暫而難久，假可襲而難持。是以君子賤霸也。說者謂泓之戰，文王之師，孟浪之言與。

二十有三年。○春，齊侯伐宋，圍緡。民宋地，緡作閔。乘宋之敝，報其伐喪也。

夏五月庚寅，宋公茲父卒。茲公作慈。

不書葬，諸侯不會也。

秋，楚人伐陳。

討其從宋也

冬十有一月杞子卒

凡卒諸侯以爵杞侯卒以子說者謂仲尼夷杞也夫杞神禹之胤商周之嘉客始封中原東徙介于齊魯卽其地夷而其君本非夷卽其君夷而爵命班自先王仲尼以已意降一等可乎然則何以書子小國來赴史降稱以尊內也不日不名史畧也

二十有四年○春王正月

夏狄伐鄭○秋七月○冬天王出居于鄭

鄭與衛爭滑襄王爲衛請于鄭鄭伯囚王使王以狄

師伐鄭取櫟遂納狄女爲后叔帶自齊歸通焉王絀
狄后后與叔帶召狄師攻王王奔鄭居于汜凡狄隗
也不稱隗狄之也伐鄭者王也不書王罪狄也天王
出居諱奔也于鄭依讐也倏伐之倏依之威福無常
政焉得不替初周之東遷也鄭爲輔及桓王蒙喪師
之恥襄王羅播遷之禍鄭爲戎故君子曰因不失親
亦可宗也向使其君不以私意爲愛憎其臣不以寵
利居成功豈不令聞長世哉

晉侯夷吾卒

晉惠公卒子圉立是爲懷公未幾重耳入殺懷公自

立是爲文公。君子曰：重耳、小白，心跡相方也。出奔同，反國同戰而入同，生竇殺子糾，高粱殺子圉，墓同，然小白書入齊，重耳不書入晉，何也？桓公四十年經營於諸侯，小補焉。晉文殘險刻薄，祚短而瑕多，未可同日語也。

二十有五年。○春，王正月丙午，衛侯燬，滅邢。

衛與邢皆以旣燼之灰，受齊桓吹噓而衛居多。桓死，衛伐其喪，邢人助狄攻之，焉齊也。衛侯用二禮陰謀，遂滅邢，其凶殘險鷙，殊無飲水知源同病相憐之意。君子曰：不仁哉燬也，是以書名。

夏四月癸酉衛侯燬卒

上書滅邢下書卒因以爲戒云

宋蕩伯姬來逆婦

伯姬歸宋蕩氏娶魯女爲婦自逆非禮也

宋殺其大夫

無傳其事不可考是歲晉重耳納襄王于周殺叔帶于隰城王出則書入不書何也其出也以天下共主變起房闥禍連夷狄非細故也比其反也非有少康復讐之師殷宗撻伐之武諸侯亡公子借播遷亡王以博一局之勝而侈譚祇樹寵利之幟爲世道羞故

城濮勝楚踐土受命彤弓大輅策命爲侯伯世儒夥
頤驚賞而春秋視猶腐鼠也吁可知春秋矣

秋楚人圍陳納頓子于頓

頓子逼于陳奔楚楚人納之往年秦納重耳今年晉
納王皆不書書楚納頓子何也其不書者人所欣艷
之霸功也其書者人所陵暴之寡小也則仲尼未嘗
夷楚亦可知也

葬衛文公

是年晉文公伐原約三日不降去之而原人服儒者
稱伐原之信春秋不錄

冬十有二月癸亥公及衛子莒慶盟于洮

地魯

衛文公卒嗣君懼齊難脩好于魯為莒人求平莒子書字史尊內也居喪會盟衛子於是為失禮

二十有六年○春王正月己未公會莒子衛甯速盟于

向

速公作邀向地

謀齊難也

齊人侵我西鄙公追齊師至鄆

莫

弗及

鄆公作嵩弗左作不

衛齊讐也魯衛同盟故齊侵魯

夏齊人伐我北鄙衛人伐齊

衛為會報也

公子遂如楚乞師

魯欲報齊乞師于楚毀藩籬而納外寇計之左也終春秋魯齊不睦坐受晉制所由失策耳

秋楚人滅夔以夔子歸

夔公作隄

夔楚同姓楚成王討其不祀先滅之說者以書人書爵為疑夫諸侯無討而擅滅人國大罪也豈待書名始見舍明白之大義索一字之隱無謂也

冬楚人伐宋圍緡

緡穀作閭

楚師為魯出以宋善晉過而伐之

公以楚師伐齊取穀

取穀居桓公子雍也使易牙奉之楚人戍之桓公之子七人爲七大夫于楚

公至自伐齊

二十有七年○春杞子來朝

杞桓公新立也稱子史尊內也

夏六月庚寅齊侯昭卒○秋八月乙未葬齊孝公

齊孝公之卒也以今年之夏魯導楚師伐齊取穀卽去年之冬齊赴魯會哀死而釋怨禮也春秋于齊魯不睦蓋屢致意焉

乙巳公子遂帥師入杞

襄仲爲政也桓公二年杞來朝不欲魯討之今嗣君來朝又討之舊史亡其故不可考然魯人侮弱可知也

冬楚人陳侯蔡侯鄭伯許男圍宋

楚人令尹子玉也楚子在行而令尹剛愎自用以至干敗故不稱楚子說者謂書人夷之豈其然乎

十有二月甲戌公會諸侯盟于宋

楚以諸侯圍宋魯受盟于師從楚也

二十有八年○春晉侯侵曹○晉侯伐衛

諸侯多從楚伐宋者曹衛寔不與晉不能得楚嫁禍

于曹衛以楚親曹衛也

公子買戍衛不卒戍刺之

魯使公子買從楚戍衛晉克衛魯懼殺買說于晉又以買不卒戍說于楚說辭兩大之間幸免矣然無罪而殺大夫若之何凡殺大夫不書其事此書直也書戍衛甚晉也書刺史文也禮惟王三刺以尊內也直事之失而不訐諱國之惡而不黨所以爲春秋

楚人救衛

宋圍乃解

三月丙午晉侯入曹執曹伯畀宋人

曹無罪。晉以楚故入其國。執其君。畀宋人挾詐力而
行喜怒。博一戰之勝。而顛連諸侯。曹人所爲。歌下泉
也。其辭曰。四國有王。郇伯勞之。無明王焉。有賢伯重
耳。所以恣其毒螫矣。故聖人刪詩。以曹風終列國。誌
王迹。熄詩亡。春秋所以作也。千古而知其解者。惟孟
子與氏世儒。顧謂春秋尊晉。賢重耳。豈不謬哉。

夏四月己巳。晉侯齊師。宋師。秦師。及楚人戰于城濮。楚
師敗績。

儒者之言曰。此一役也。楚詘而諸侯始從晉。晉霸而
中國無楚禍矣。城濮之戰。召陵之盟。千古建之。愚謂

不然。夫聖人所憂者，天下無道耳。有道，何擇于楚？無道，何擇于晉？此一役也。而王室可興，民生可綏，十九諸侯朝覲會同，煥然復文武之舊。若是，則何愛于楚？城濮之功，九廟承之，竹帛書之，可也。而今楚詘，惟詘其晉之所忌耳。勝楚，惟晉之自成為盟主耳。楚勝，卽諸侯從楚，楚不勝，亦諸侯從晉。總之，王室無賴焉，民生無濟焉。楚衡行中國，與晉衡行中國等。又誰擇乎？故城濮勝而晉始驕，奪人之國邑，貪人之貨賄，殺人之臣子，執人之君父。諸侯終歲奔走，惟晉東西，非赴晉朝，則納晉幣，從晉征討。天下攘攘，不得卽安。仲尼

憂之乃作春秋詩云何草不玄何人不矜哀我征夫
獨爲匪民晉與楚均遺仲尼之憂者也使晉霸天下
安春秋不作可矣或曰楚不敢兼中原非晉之力與
曰然顧晉亦不敢兼諸侯非楚之力與晉自重耳納
王請隧包藏不軌召天子朝諸侯睥睨神器所不得
滿志惟楚人控其膺耳故有晉不可無楚無楚亦不
必有晉存則兩存絀則并絀彼執夷夏之例爲安攘
之說守章之見而不識天下之機者也然則仲尼稱
管仲曰吾其披髮左衽所謂披髮左衽者非楚與曰
非也聖人之寓言也春秋諸國無披髮左衽者雖陸

渾赤白狄居中國久亦無披髮左衽者昔戎狄伐周
伐晉侵曹侵杞滅衛齊桓公伐山戎管仲平戎于周
隰朋平戎于晉城緣陵遷杞城楚丘遷衛城夷儀遷
邢所謂免于披髮左衽以此烏在其謂楚乎昔者西
周之亡也以戎而東周之有戎也以晉晉人遷陸渾
于洛以逼東周楚子伐之春秋書之予楚功也豈其
伐戎者反斥爲夷而豢戎者反爲攘夷乎先王之制
蠻夷要服去王畿二千里戎狄荒服去王畿二千五
百里楚上世爲文王師受封先齊魯都郢卽今歸州
去中原纔千里而南蠻遠在炎徼北向之外楚宅南

方侯服之中。惟是洞庭彭蠡稱三苗。唐虞已分北。是地爲華壤久矣。豈仲尼作春秋尚追數四凶乎。江漢汝墳。二南首善。斥爲蠻荒。則五服缺一面。而中原無南土矣。豈春秋之義然則春秋無惡于楚乎。曰有之。惡其僭稱王。惡其蠶食諸姬。吞併小國。惡其興兵構怨。與齊晉汨亂天下。凡春秋所惡于楚者。晉皆有楚所得罪于春秋者。晉不無。然則天下何賴于晉。何獨責于楚。晉欲致楚不能。而說者解朝曰。夷狄不可同盟。會夫盟會。非聖人之禮。不同盟會。非聖人之禁。世儒艷霸功而臆爲例。何可以論春秋也。

卷六
楚殺其大夫得臣

得臣令尹子玉也。城濮之役，楚子欲退，令尹主戰而敗。楚子誅之。說者曰：晉再勝，楚再敗，非也。禮謀人軍，師敗則死之。城濮敗而誅子玉，泚水退而誅子上，鄢陵戰而誅子反。屬國叛而誅子辛，是乃楚所以振爾衛侯出奔楚。

晉以楚故伐衛。衛成公請受盟，晉不許。立其弟叔武。成公出奔，執而囚之。遂使兄弟相夷，君臣交訟，凡重耳所爲，深刻怨毒之無已也。

五月癸丑，公會晉侯、齊侯、宋公、蔡侯、鄭伯、衛子、莒子盟。

于踐踐土鄭地

重耳召襄王會踐土以諸侯見遂諷王饗醴策命爲侯伯賜大輅弓矢虎賁皆不書春秋之意可知衛子叔武也不成其君故稱子

陳侯如會

後至也陳初從于楚楚敗故卽晉

公朝于王所

踐土之會王在不書何也天子不與諸侯齒書王所而王會可知也重耳氣餒方張明禮義以正之故書朝王公朝則諸侯皆朝矣不及諸侯何也不與諸侯

朝也。其不與諸侯朝何也？諸侯之朝晉以之也。不與諸侯朝不與晉之以也。凡朝王三年五年于京師于方岳脩禮比瑞召王而朝非禮也。其與魯朝何也？非與魯也。春秋內魯君舉必書其不書地而書王所何也不巡狩述職不御明堂祭告以萬乘廬于野之謂王所爾矣。

六月衛侯鄭自楚復歸于衛

名衛侯以別于踐土之衛子也

衛元咺

方上聲

出奔晉

晉立叔武使元咺奉之成公入前驅射叔武殺之元

咺奔訟于晉

陳侯款卒

秋杞伯姬來

莊公女歸寧也。伯姬適杞。今三十有六年矣。父母沒而歸寧。非禮也。

公子遂如齊

齊魯復通好

冬公會晉侯、齊侯、宋公、蔡侯、鄭伯、陳子、莒子、邾子、秦人于溫。

會不列王。殊至尊也。

天王狩于河陽

河陽卽溫也。王會于溫。晉再召也。踐土召王不書。再召不書。是藪亂也。書與諸侯列。是履冠也。故別書天王狩于河陽。溫在河之陽也。若曰。天王出狩云爾。所以振頽風。折奸雄。而弭兇節也。寔同會而別書。寔應召而書狩。寔召王而書王狩。寔溫而書河陽。不使強臣陵暴之氣。得加乎至尊。名正言順。辭曲義暢。所以爲春秋也。

壬申。公朝于王所。

入春秋五公。上下八十餘年矣。諸侯不朝。而踐土河

陽皆天子枉招草野遠廬苟簡之禮聖人記錄唯謹以婉轉維持於姦雄陵厲之秋使名義凜然千載而下想見忠愛之心正直之氣非聖作烏能及此
晉人執衛侯歸之于京師

以元咺之愬也歸于京師譎也叔武之死實重耳致之非天子而變置諸侯人誰肯已固宜其有欲犬之禍也乃黨賊臣囚君不避冠履按重耳之事而不艱然者無是非之心者也

衛元咺自晉復歸于衛

以臣訟君囚其君而縱其臣不可爲典刑左氏謂晉

文一戰而霸禮義之教也嗟夫重耳焉知禮義

諸侯遂圍許

晉以不朝王討許也夫許不朝見討諸侯朝不書何也諸侯之朝不足錄許不朝亦可討也然則與晉乎非也晉討不附已以不朝爲名春秋不獨罪許亦惡諸侯之從晉圍許者

曹伯襄復歸于曹遂會諸侯圍許

晉文公有疾曹人貨筮史稱曹叔振鐸之爲祟也乃釋曹伯按是年夏至冬凡數月書重耳事十有五大抵陵上暴寡兇殘猾賊譎而不正不厭枚舉所謂書

用識哉五霸之罪無如此獨詳矣世儒顧左袒奸雄
使春秋大義虧嚴不明可勝歎乎

二十有九年○春介葛盧來

介小國葛盧其君名時公在會不書朝其有他故不
可考矣

公至自圍許

夏六月會王人晉人宋人齊人陳人蔡人秦人盟于翟

秋

泉

周地公作狄
會上有公字

尋踐土之盟謀伐鄭也霸者合諸侯屈王臣下盟是
天子受盟于諸侯自翟泉始也六國皆大夫魯君往

故不稱公諱也

秋大雨雹

齊

○冬介葛盧來

春未見公故復來

三十年○春王正月○夏狄侵齊

重耳方張何以不攘狄詩云彼童而角寶虹小子其霸者攘夷之謂與

秋衛殺其大夫元咺及公子瑕○衛侯鄭歸于衛

元咺歸復立公子瑕甯俞賂晉乃釋衛侯衛侯歸殺元咺子瑕而後入嗟乎大夫若元咺者亦可殺矣世儒猶執書爵之例迂矣哉

晉人秦人圍鄭

初重耳出亡過鄭鄭不禮焉至是與秦人圍鄭秦人私與鄭盟去之秦晉之隙始此

介人侵蕭

中原有霸靡國不爭矣

冬天王使宰周公來聘○公子遂如京師遂如晉

入春秋八十餘年魯無如周之使非無使也使陪臣不書此書何也王以河陽之會致謝慇懃魯以陪臣報禮且爲如晉行故直之說者謂譏遂事謬也

三十有一年○春取濟西田

初晉執曹伯以曹地分諸侯曹伯復而魯猶取其田失不獨晉也諸侯土宇受之先王霸者以意奪此予彼亂也故春秋所惡莫如晉

公子遂如晉

拜濟西田也

夏四月四卜郊不從乃免牲猶三望

郊祭王者所以祀天也天子祀天禮也諸侯祀天非禮也昔者成王尊周公使魯大廟用禘漸及僖公遂郊天三望而魯之僭多于諸侯矣仲尼諱之郊不書于不郊免牲書因所廢志所舉也禮大享不上魯郊

禮乎何必卜。非禮。卜亦不可。再三瀆況乃四乎。免牲免牛也。猶三望不望可也。禮四方嶽瀆天子至一方則望三。諸侯望不越境內。魯三望僭也。

秋七月○冬杞伯姬來求婦

婦人越國議婚非禮也

狄圍衛○十有二月衛遷于帝丘

穀于作於

衛爲狄滅遷楚丘今三十餘年狄又滅之重耳爲方伯亡其同姓而不問愧小白多矣小白之霸也可以爲名也者取之不可以爲名也者置之重耳之霸也可以爲利也者取之不可以爲利也者置之小白以

存衛爲名。勝狄爲無名。故遷衛而不與狄爭也。重耳以勝人爲利。救人爲無利。故并衛之遷亦不問也。二霸心術人品相去遠。故楚丘遷書城。帝丘遷書衛。無預于晉與諸侯之辭也。

三十有二年○春王正月

是年晉楚平不書。可以觀春秋待晉楚矣。

夏四月己丑鄭伯捷卒

接公作接

衛人侵狄○秋衛人及狄盟

衛人之不忘狄宜也。然自強無策。乘其亂侵之。無功又與之盟。其無能爲可知矣。

冬十有二月己卯晉侯重耳卒

重耳貪殘之主斗筭之器出亡所過唯酒食是議唯女子車馬是好顰笑睚眦必刻臂書紳懷螫圖報是姦猾之老宿耳當其臨深爲高擠人于淵不遺餘力苟求快意無復怵惕之心覆曹傾衛何怨毒之深也主盟八年春秋所書十有八事皆陰險刻薄無一當人意而世儒嘖嘖稱爲康侯賢伯豈非詔乎豈非陋乎

三十有三年○春王二月秦人入滑

晉邑

秦穆公聽杞子計潛師越晉以襲鄭師及滑鄭人弦

高詒犒秦師秦謂鄭有備入滑而還

齊侯使國歸父來聘

報襄仲也

夏四月辛巳晉人及姜戎敗秦師于殽

公無師字

秦師還及殽晉人邀擊獲其帥孟明西乞白乙丙夫
人文嬴請釋之君子曰晉之託于秦厚矣重耳復國
秦人復之也城濮之戰河陽之會翟泉之盟無役不
與共是秦有大造于晉也背舊好而邀一旦之功晉
實孤恩乘人喪而掠其鄙邑秦實開敵據事直書是
非自見說者曰書人不正之安見不書人者皆正乎

又曰書秦狄之且不稱秦將何稱乎

癸巳葬晉文公○狄侵齊

傳謂因晉喪也重耳在狄人亦圍衛其有晉喪乎且
既爲穀之役又何辭于狄傳之諛霸偏曲類此

公伐邾取訾婁

訾婁公作婁
殺作訾婁

報升陘之役也

秋公子遂帥師伐邾

甚魯也

晉人敗狄于箕

狄侵晉晉人敗之

冬十月公如齊○十有二月公至自齊

朝齊且弔狄難也

乙巳公薨于小寢

小寢以燕息禮君終于路寢

隕霜不殺草李梅實

隕公作實

記異也

晉人陳人鄭人伐許

許附楚也

春秋直解卷六終